

## बचित्र नाटक

१६ १ओंकार सतिगुर प्रसादि ।

अथ बचित्र नाटक ग्रंथ लिख्यते ।

स्त्री मुखवाक पातसाही १० ।

त्वप्रसादि । दोहरा

नमसकार स्त्री खड़ग को करौ सु हितु चितु लाइ ।

पूरन करौ गिरंथ इहु तुम मुहि करहु सहाइ ।१।

### स्त्री काल जी की उसतति ।

त्रिभंगी छंद

खग खंड बिहंडं खलदल खंडं अति रण मंडं बरबंडं ।

भुज दंग अखंडं तेज प्रचंडं जोति अमंडं भानु प्रभं ।

सुख संता करणं दुरमति दरणं किलबिख हरणं असि सरणं ।

जै जै जग कारण स्त्रिसटि उबारण मम प्रतिपारण जै तेगं ।२।

भुजंग प्रयात छंद

सदा एक जोत्यं अजूनी सरूपं । महादेव देवं महा भूप भूपं ।

निरंकार नित्यं निरूपं त्रिबाणं । कलं कारणेयं नमो खड़गपाणं ।३।

निरंकार त्रिबिकार नित्यं निरालं । न ब्रिधं बिसेखं न तरुनं न बालं ।

न रंकं न रायं न रूपं न रेखं । न रंगं न रागं अपारं अभेखं ।४।

न रूपं न रेखं न रंगं न रागं । न नामं न ठामं महा जोति जागं ।

न द्वैखं न भेखं निरंकार नित्यं । महा जोग जोगं सु परमं पवित्यं ।५।

अजेयं अभेयं अनामं अठामं । महाजोग जोगं महा काम कामं ।

अलेखं अभेखं अनीलं अनादं । परेयं पवित्रं सदा त्रिबिखादं ।६।

सुआदं अनादं अनीलं अनंतं । अद्वैखं अभेखं महेसं महंतं ।  
 न रोखं न सोखं न द्रोहं न मोहं । न कामं न क्रोधं अजोनी अजोहं ।७।  
 परेयं पवित्रं पुनीतं पुराणं । अजेयं अभेयं भविख्यं भवाणं ।  
 न रोगं न सोगं सु नित्यं नवीनं । अजायं सहायं परमं प्रवीनं ।८।

सु भूतं भविख्यं भवानं भवेयं । नमो त्रिबिकार नमो त्रिजुरेयं ।  
 नमो देव देवं नमो राज राजं । निरालंब नित्यं सु राजाधिराजं ।९।  
 अलेखं अभेखं अभूतं अद्वैखं । न रागं न रंगं न रूपं न रेखं ।  
 महा देव देव महा जोग जोगं । महा काम कामं महा भोग भोगं ।१०।

कहूं राजसं तामसं सातकेयं । कहूं नारि को रूप धारे नरेयं ।  
 कहूं देवीयं देवतं दर्शित रूपं । कहूं रूपं अनेक धारे अनूपं ।११।  
 कहूं फूल हवै कै भले राज फूले । कहूं भवर हवै कै भली भाति भूले ।  
 कहूं पवन हवै कै बहे बेगि ऐसे । कहे मो न आवे कथौ ताहि कैसे ।१२।

कहूं नाद हवै कै भली भांति बाजे । कहूं पारधी हवै धरे बान राजे ।  
 कहूं म्रिग हवै कै भली भाति मोहे । कहूं कामकी जिउ धरे रूप सोहे ।१३।  
 नही जानि जाई कछू रूप रेखं । कहा बास ता को फिरै कउन भेखं ।  
 कहा नाम ता को कहा कै कहावै । कहा मै बखानो कहे मो न आवै ।१४।

न ताको कोई तात मातं न भायं । न पुत्रं न पौत्रं न दाया न दायं ।  
 न नेहं न गेहं न सैनं न साथं । महा राज राजं महा नाथ नाथं ।१५।  
 परमं पुरानं पवित्रं परेयं । अनादं अनीलं असंभं अजेयं ।  
 अभेदं अछेदं पवित्रं प्रमाथं । महा दीन दीनं महा नाथ नाथं ।१६।

अदागं अदगं अलेखं अभेखं । अनंतं अनीलं अरूपं अद्वैखं ।  
 महा तेज तेजं महा ज्वाल ज्वालं । महा तंत्र मंत्र महा काल कालं ।१७।  
 करं बाम चापियं क्रिपाणं करालं । महा तेज तेजं बिराजै बिसालं ।  
 महा दाड़ दाड़ं सु सोहं अपारं । जिनै चरबीयं जीव जग्यं हजारं ।१८।

डमा डंड डउरू सितासेत छत्रं । हाहा हूह हासं झमा झम अत्रं ।  
 महा घोर सबदं बजे संख ऐसं । प्रलै काल के काल की ज्वाल जैसं ।१९।

### रसावल छंद

घणं घंट बाजं । धुणं मेघ लाजं ।  
 भयो सद एवं । हड़ियो नीर धेवं ।२०।  
 घुरं घुंघरेयं । धुणं नेवरेयं ।  
 महा नाद नादं । सुरं निरबिखादं ।२१।

सिरं माल राजं । लखे रुद्र लाजं ।  
 सुभे चार चित्रं । परमं पवित्रं ।२२।  
 महा गरज गरजं । सुणे दूत लरजं ।  
 स्रवं स्रोण सोहं । महा मान मोहं ।२३।

### भुजंग प्रयात छंद

स्त्रिजे सेतजं जेरजं उतभुजेवं । रचे अंडजं खंड ब्रहमंड एवं ।  
 दिसा बिदिसायं जिमी आसमाणं । चतुर बेद कथ्यं कुराणं पुराणं ।२४।  
 रचे रैण दिवसं थपे सूर चंद्रं । ठटे दईव दानो रचे बीर बिंद्रं ।  
 करी लोह कलमं लिख्यो लेख माथं । सबै जेर कीने बली काल हाथं ।२५।

कई मेटि डारे उसारे बनाए । उपारे गड़े फेरि मेटे उपाए ।  
 क्रिआ काल जू की किनू न पछानी । घनियो पै बिहै है घनियो पै बिहानी ।२६।  
 किते क्रिसन से कीट कोटै बनाए । किते राम से मेटि डारे उपाए ।  
 महादीन केते प्रिथी माझि हूए । समै आपनी आपनी अंति मूए ।२७।

जिते अउलीआ अंबीआ होइ बीते । तित्यो काल जीता न ते काले जीते ।  
जिते राम से क्रिसन हुइ बिसनु आए । तित्यो काल खापिउ न ते काल घाए ।२८।

जिते इंद्र से चंद्र से होत आए । तित्यो काल खापा न ते कालि घाए ।  
जिते अउलीआ अंबीआ गउस ह्वै हैं । सभै काल के अंत दाड़ा तलै है ।२९।

जिते मानधातादि राजा सुहाए । सभै बाधि कै काल जेलै चलाए ।  
जिनै नाम ता को उचारो उबारे । बिना साम ता की लखे कोटि मारे ।३०।

### त्वप्रसादि । रसावल चंद

चमकहि क्रिपाणं । अभूतं भयाणं । धुणं नेवराणं । घुरं घुंघयाणं ।३१।  
चतुर बाह चारं । निजूटं सुधारं । गदा पास सोहं । जमं मान मोहं ।३२।  
सुभं जीभ जुआलं । सु दाड़ा करालं । बजी बंब संखं । उठे नादं बंखं ।३३।  
सुभं रूप सिआमं । महा सोभ धामं । छबे चारु चित्रं । परेअं पवित्रं ।३४।

### भुजंग प्रयात छंद

सिरं सेत छत्रं सु सुभ्रं बिराजं । लखे छैल छाइआ करे तेज लाजं ।  
बिसाल लाल नैनं महाराज सोहं । ढिगं अंसुमालं हसं कोटि क्रोहं ।३५।  
कहूं रूप धारे महाराज सोहं । कहूं देव कंनिआनि के मान मोहं ।  
कहूं बीर ह्वै के धरे बान पानं । कहूं भूप ह्वै कै बजाए निसानं ।३६।

### रसावल छंद

धनुर बान धारे । छके छैल भारे ।  
लए खग ऐसे । महाबीर जैसे ।३७।  
जुरे जंग जोरं । करे जुध घोरं ।  
क्रिपा निधि दिआलं । सदायं क्रिपालं ।३८।

सदा एक रूपं । सभै लोक भूपं ।  
 अजेअं अजायं । सरनियं सहायं ।३९।  
 तपै खग पानं । महा लोक दानं ।  
 भविखिअं भवेअं । नमो निरजुरेअं ।४०।

मधो मान मुंडं । सुभं रुंड झुंडं ।  
 सिरं सेत छत्रं । लसं हाथ अत्रं ।४१।  
 सुणे नाद भारी । त्रसै छत्रधारी ।  
 दिसा बसत्र राजं । सुणे दोख भाजं ।४२।  
 सुणे गद सदं । अनंतं बेहदं ।  
 घटा जाणु सिआमं । दुतं अभिरामं ।४३।  
 चतुर बाह चारं । करीटं सुधारं ।  
 गदा संख चक्रं । दिपै क्रूर बक्रं ।४४।

#### नराज छंद

अनूप रूप राजिअं । निहार काम लाजियं ।  
 अलोक लोक सोभिअं । बिलोक लोक लोभिअं ।४५।  
 चमकि चंद्र सीसियं । रहियो लजाइ ईसयं ।  
 सु सोभ नाग भूखणं । अनेक दुसट दूखणं ।४६।

क्रिपाण पाण धारीयं । करोर पाप टारीयं ।  
 गदा गिसट पाणियं । कमाण बाण ताणियं ।४७।  
 सबद संख बजियं । घणंकि घुंमर गजियं ।  
 सरनि नाथ तोरीयं । उबार लाज मोरीयं ।४८।

अनेक रूप सोहीयं । बिसेख देव मोहीयं ।  
 अदेव देव देवलं । क्रिपा निधान केवलं ।४९।  
 सु आदि अंति एकियं । धरे सरूप अनेकियं ।  
 क्रिपाण पाण राजई । बिलोक पाप भाजई ।५०।  
 अलंकित सु देहयं । तनो मनो कि मोहियं ।  
 कमाण बाण धारही । अनेक सत्र टारही ।५१।  
 घमकि घुंघरं सुरं । नवं ननाद नूपरं ।  
 प्रजुआल बिजुलं जुलं । पवित्र परम निरलमं ।५२।

त्वप्रसादि । तोटक छंद

नव नेवर नाद सुरं त्रिमलं । मुख बिजुल जुआल घणं प्रजुलं ।  
मदरा कर मत महा भभकं । बन मै मनो बाघ बचा बबकं ।५३।  
भव भूत भविख भवान भवं । कल कारण उबारण एक तुवं ।  
सभ ठौर निरंतर नित नयं । म्रिद मंगल रूप तुयं सुभयं ।५४।

द्रिड़ दाड़ कराल द्वै सेत उधं । जिह भाजत दुसट बिलोक जुधं ।  
मद मत क्रिपाण कराल धरं । जय सद सुरासुरयं उचरं ।५५।  
नव किंकण नेवर नाद हूंअं । चल चाल सभाचल कंप भूअं ।  
घण घुंघर घंटण घोर सुरं । चर चार चराचरयं हुहरं ।५६।

चल चौदहूं चक्रन चक्र फिरं । बढवं घटवं हरीअं सुभरं ।  
जग जीव जिते जलयं थलयं । अस को जु तवाइसिअं मलयं ।५७।  
घट भादव मास की जाण सुंभ । तन सावरे रावरेअं हुलसं ।  
रस पंगति दामिनीअं दमंकं । घट घुंघर घंट सुर घमकं ।५८।

भुजंग प्रयात छंद

घटा सावणं जाण स्यामं सुहायं । मणी नील नगियं लख सीस निआयं ।  
महा सुंदर स्यामं महा अभिरामं । महा रूप रूपं महा काम कामं ।५९।  
फिरै चक्र चउदह पुरीयं मधिआणं । इसो कौन बीयं फिरै आइसाणं ।  
कहो कुंट कौने बिखै भाज बाचे । सभं सीस के संग स्त्री काल नाचै ।६०।

करे कोट कोऊ धरै कोटि ओटं । बचैगो न किउ हूं करै काल चोटं ।  
लिख जंत्र केते पड़ं मंत्र कोटं । बिना सरनि ताकी नही ओर ओटं ।६१।  
लिखं जंत्र थाके पड़ं मंत्र हारै । करे काल के अंत लै के बिचारे ।  
कितिओ तंत्र साधे जु जनम बिताइओ । भए फोकटं काज एकै न आइओ ।६२।

किते नास मूंदे भए ब्रह्मचारी । किते कंठ कंठी जटा सीस धारी ।  
किते चीर कानं जुगीसं कहायं । सभे फोकटं धरम कामं न आयं ।६३।

मधु कीटभं राछसेसं बलीअं । समे आपनी काल तेऊ दलीअं ।  
भए सुंभ नैसुंभ स्रोगंतबीजं । तऊ काल कीने पुरेजे पुरेजं ।६४।

बली प्रिथीअं मानधाता महीपं । जिनै रथ चक्रं कीए सात दीपं ।  
भुजं भीम भरथं जगं जीत डंडियं । तिनै अंत के अंत कौ काल खंडियं ।६५।

जिनै दीप दीपं दुहाई फिराई । भुजा दंड दै छोणि छत्रं छिनाई ।  
करे जग कोटं जसं अनिक लीते । वहै बीर बंके बली काल जीते ।६६।

कई कोट लीने जिनै दुरग ढाहे । किते सूरबीरान के सैन गाहे ।  
कई जंग कीने सु साके पवारे । वहै दीन देखै गिरे काल मारे ।६७।

जिनै पातिसाही करी कोटि जुगियं । रसं आनरसं भली भाति भुगियं ।  
वहै अंत को पाव नागे पधारे । गिरे दीन देखे हठी काल मारे ।६८।

जिनै खंडीअं दंड धारं अपारं । करे चंद्रमा सूर चरे दुआरं ।  
जिनै इंद्र से जीत के छोडि डारे । वहै दीन देखे गिरे काल मारे ।६९।

### रसावल छंद

जिते राम हुए । सभै अंति मूए । जिते क्रिसन ह्वै है । सभै अंति जै है ।७०।  
जिते देव होसी । सभै अंत जासी । जिते बोध ह्वै है । सभै अंति छै है ।७१।  
जिते देव रायं । सभै अंत जायं । जिते दर्इत एसं । तित्यो काल लेसं ।७२।

नरसिंघावतारं । वहे कल मारं । बडो डंडधारी । हणिओ काल भारी ।७३।  
दिजं बावनेयं । हणिओ काल तेयं । महा मछ मुंडं । फधिओ काल झुंडं ।७४।  
जिते होइ बीते । तिते काल जीते । जिते सरनि जै है । तितिओ राखि लैहे ।७५।

### भुजंग प्रयात छंद

बिना सरनि ताकी न अउरै उपायं । कहा देव दर्ईतं कहा रंक रायं ।  
 कहा पातिसाहं कहा उमरायं । बिना सरनि ताकी न कोटै उपायं ।७६।  
 जिते जीव जंतं सु दुनीअं उपायं । सभै अंतिकालं बली कालि घायं ।  
 बिना सरनि ताकी नही और ओटं । लिखे जंत्र केते पड़े मंत्र कोटं ।७७।

### नराज छंद

जितेकि राज रंकयं । हने सु काल बंकयं ।  
 जितेकि लोक पालयं । निदान काल दालयं ।७८।  
 क्रिपाल पाणि जे जपै । अनंत थाट ते थापै ।  
 जितेकि काल धिआइ है । जगति जीत जाइ है ।७९।

बचित्र चार चित्रयं । परमयं पवित्रयं ।  
 अलोक रूप राजियं । सुणे सु पाप भाजियं ।८०।  
 बिसाल लाल लोचनं । बिअंत पाप मोचनं ।  
 चमक चंद्र चारयं । अघी अनेक तारयं ।८१।

### रसावल छंद

जिते लोक पालं । तिते जेर कालं ।  
 जिते सूर चंद्रं । कहा इंद्र बिंद्रं ।८२।

### भुजंग प्रयात छंद

फिरै चौदहूं लोकयं काल चक्रं । सभै नाथ नाथे भ्रमं भउह बकं ।  
 कहा राम क्रिसनं कहा चंद सूरं । सभै हाथ बाधे खरे काल हजूरं ।८३।

### स्वैया

काल ही पाइ भयो भगवान सु जागत या जग जाकी कला है ।  
 काल ही पाइ भयो ब्रहमा सिव काल ही पाइ भयो जुगीआ है ।  
 काल ही पाइ सुरासुर गंध्रब जछ भुजंग दिसा बिदिसा है ।  
 अउर सुकाल सभै बसि काल के एक ही काल अकाल सदा है ।८४।

## भुजंग प्रयात छंद

नमो देव देवं नमो खड़ग धारं । सदा एक रूपं सदा निरबिकारं ।  
नमो राजसं सातकं तामसेअं । नमो निरबिकारं नमो निरजुरेअं ।८५।

## रसावल छंद

नमो बाण पाणं । नमो निरभयाणं ।  
नमो देव देवं । भवाणं भवेअं ।८६।

## भुजंग प्रयात छंद

नमो खग खंडं क्रिपाण कटारं । सदा एक रूपं सदा निरबिकारं ।  
नमो बाण पाणं नमो दंड धारिउं । जिनै चौदहूं लोक जोतं बिथारियं ।८७।  
नमसकारयं मोर तीरं तुफंगं । नमो खग अदगं अभैयं अभंगं ।  
गदायं गिसटं नमो सैहथीअं । जिनै तुलीयं बीर बीयो न बीअं ।८८।

## रसावल छंद

नमो चक्र पाणं । अभूतं भयाणं ।  
नमो उग्रदाडं । महा गिसट गाडं ।८९।  
नमो तीर तोपं । जिनै सत्र घोपं ।  
नमो धोप पटं । जिने दुसट दटं ।९०।  
जिते ससत्र नामं । नमसकार तामं ।  
जिते असत्र भैयं । नमसकार तेयं ।९१।

## स्वैय्या

मेरु करो त्रिण ते मुहि जाहि गरीब निवाज न दूसर तो सो ।  
भूल छिमो हमरी प्रभ आपन भूलनहार कहूं कोऊ मो सो ।  
सेव करी तुमरी तिन के सभ ही ग्रिह देखीअत द्रब भरो सो ।  
या कल मै सभ काल क्रिपान के भारी भुजान को भारी भरोसो ।९२।

सुंभ निसुंभ से कोट निसचार जाहि छिनेक बिखै हनि डारे ।  
धूमर लोचन चंड अउ मुंड से माहिख से पल बीच निवारे ।  
चामर से रणि चिछर से रकतिछण से झट दै झझकारे ।  
ऐसो सु साहिबु पाइ कहा परवाह रही इह दास तिहारे ।९३।

मुंडहु से मधु कीटभ से मुर से अघ से जिनि कोटि दले है ।  
 ओटि करी कबहुं न जिनै रणि चोट परी पग द्वै न टले है ।  
 सिंधु बिखै जे न बूडे निसचार पावक बाण बहे न जले है ।  
 ते असि तोरि बिलोकि अलोक सु लाज को छाड कै भाजि चले है ।१४।

रावण से महिरावण से घटकानहु से पल बीच पछारे ।  
 बारद नाद अकंपन से जग जंग JURै जिन सिउ जम हारे ।  
 कुंभ अकुंभ से जीत सभै जगि सातहुं सिंध हथिआर पखारे ।  
 जे जे हुते अकटे बिकटे सु कटे करि काल क्रिपान के मारे ।१५।

जो कहूं काल ते भाज के बाचीअत तो किह कुंट कहो भजि जाईयै ।  
 आगे हूं काल धरे असि गाजत छाजत है जिह ते नसि अईयै ।  
 ऐसे न कै गयो कोई सु दाव रे जाहि उपाव सो घाव बचईयै ।  
 जाते न छुटीयै मुड़ कहूं हसि ताकी न किउ सरणागति जईयै ।१६।

क्रिसन अउ बिसनु जपे तुहि कोटिक राम रहीम भली बिधि धिआयो ।  
 ब्रहम जपिओ अरु संभु थपिओ तहि ते तुहिको किन हूं न बचायो ।  
 कोटि करी तपसा दिन कोटिक काहू न कौडी को काम कढायो ।  
 काम का मंत्र कसीरे के काम न काल को घाउ किनहूं न बचायो ।१७।

काहे रे कूर करे तपसा इन की कोऊ कौडी के काम न ऐहै ।  
 तोहि बचाइ सकै कहु कैसे कै आपन घाव बचाइ न ऐहै ।  
 कोप कराल की पावक कुंड मै आपि टंगिओ तिम तोहि टंगै है ।  
 चेत ते चेत अजो जीअ मै जड़ काल क्रिपा बिनु काम न ऐहै ।१८।

ताहि पछानत है न महा पसु जा को प्रतापु तिहूं पुर माही ।  
 पूजत है परमेसर कै जिह कै परसै परलोक पराही ।  
 पाप करो परमारथ कै जिह पापन ते अति पाप लजाई ।  
 पाइ परो परमेसर के जड़ पाहन मै परमेसर नाही ।१९।

मोन भजे नही मान तजे नही भेख सजे नही मूंड मूंडाए ।  
 कंठि न कंठी कठोर धरै नही सीस जटान के जूट सुहाए ।  
 साचु कहो सुनि लै चितु दै बिनु दीन दिआल की साम सिधाए ।  
 प्रीति करे प्रभु पायत है किरपाल न भीजत लांड कटाए ।१००।

कागद दीप सभै करि कै अर सात समुंद्रन की मसु कैहो ।  
 काटि बनासपती सिगरी लिखबे हूं के लेखन काजि बनैहो ।  
 सारसुती बकता करि कै जुग कोटि गनेस कै हाथि लिखैहो ।  
 काल क्रिपाल बिना बिनती न तऊ तुम को प्रभ नैकु रिझैहो ।१०१।

इति श्री बचित्र नाटक ग्रंथे श्री काल जी की उसतति  
 प्रिथम धिआइ संपूरनं सतु सुभम सतु ।१।

## कवि बंस वरणन

### चौपई

तुमरी महिमा अपर अपारा । जा का लहिओ न किन हूं पारा ।  
 देव देव राजन के राजा । दीन दिआल गरीब निवाजा ।१।

### दोहरा

मूक ऊचरै सासत्र खटि पिंग गिरन चड़ि जाइ ।  
 अंध लखै बधरो सुनै जो काल क्रिपा कराइ ।२।

### चौपई

कहा बुधि प्रभ तुछ हमारी । बरनि सकै महिमा जु तिहारी ।  
 हम न सकत करि सिफत तुमारी । आप लेहु तुम कथा सुधारी ।३।  
 कहा लगै इहु कीट बखानै । महिमा तोरि तुही प्रभ जानै ।  
 पिता जनम जिम पूत न पावै । कहा तवन का भेद बतावै ।४।

तुमरी प्रभा तुमै बनि आई । अउरन ते नही जात बताई ।  
 तुमरी क्रिआ तुम ही प्रभ जानो । ऊच नीच कस सकत बखानो ।५।  
 सेस नाग सिर सहस बनाई । द्वै सहंस रसनाह सुहाई ।  
 रटत अब लगे नाम अपारा । तुमरो तऊ न पावत पारा ।६।

तुमरी क्रिआ कहा कोऊ कहै । समझत बात उरझि मति रहै ।  
 सूछम रूप न बरना जाई । बिरधु सरूपहि कहो बनाई ।७।  
 तुमरी प्रेम भगति जब गहिहो । छोरि कथा सभ ही तब कहि हो ।  
 अब मै कहो सु अपनी कथा । सोढी बंस उपजिआ जथा ।८।

### दोहरा

प्रथम कथा संछेप ते कहो सु हित चितु लाइ ।  
 बहुरि बडो बिसथार कै कहिहौ सभै सुनाइ ।९।

### चौपई

प्रिथम काल जब करा पसारा । ओअंकार ते स्रिसटि उपारा ।  
 कालसैन प्रथमै भइओ भूपा । अधिक अतुल बलि रूप अनूपा ।१०।  
 कालकेतु दूसर भूअ भइओ । क्रूरबरस तीसर जगि ठयो ।  
 कालधुज चतुरथ त्रिप सोहै । जिह ते भयो जगत सभ को है ।११।

सहसराछ जा को सुभ सोहै । सहस पाद जा के तनि मोहै ।  
 सेख नाग पर सोइबो करै । जग तिह सेख साइ उचरै ।१२।  
 एक स्रवण ते मैल निकारा । ता ते मधू कीटभ तन धारा ।  
 दुतीआ कान ते मैल निकारी । ता ते भई स्रिसटि इह सारी ।१३।

तिन को काल बहुरि बध करा । तिन को मेद समुंद मो परा ।  
 चिकन तास जल पर तिर रही । मेधा नाम तबहि ते कही । १४।  
 साध करम जे पुरख कमावै । नाम देवता जगत कहावै ।  
 कुक्रित करम जे जग मै करही । नाम असुर तिन को सभ धर ही ।१५।  
 बहु बिसथार कह लगै बखानीअत । ग्रंथ बढन ते अति डरु मानीअत ।  
 तिन ते होत बहुत त्रिप आए । दछ प्रजापति जिन उपजाए ।१६।  
 दस सहंस तिहि ग्रिह भई कंनिआ । जिह समान कह लगै न अंनिआ ।  
 काल क्रिआ ऐसी तह भई । ते सभ बिआह नरेसन दई ।१७।

### दोहरा

बनता कद्र दिति अदिति ए रिख बरी बनाइ ।  
 नाग नागरिपु देव सभ दईत लए उपजाइ ।१८।

### चौपई

ताते सूरज रूप को धरा । जाते बंस प्रचुर रवि करा ।  
 जौ तिन के कहि नाम सुनाऊ । कथा बढन ते अधिक डराऊ ।१९।

तिन के बंस बिखै रघु भयो । रघु बंसहि जिह जगहि चलयो ।  
ताते पुत्र होत भयो अजु बरु । महा रथी अरु महा धनुरधर ।२०।  
जब तिन भेस जोग को लयो । राज पाट दसरथ को दयो ।  
होत भयो वहि महा धनुरधर । तीन त्रिआन बरा जिह रुचि कर ।२१।

प्रिथम जयो तिह रामु कुमारा । भरथ लछमन सत्र बिदारा ।  
बहुत काल तिन राज कमायो । काल पाइ सुर पुरहि सिधायो ।२२।  
सीअ सुत बहुरि भए दुइ राजा । राज पाट उन ही कउ छाजा ।  
मद्र देस एस्वरजा बरी जब । भाति भाति के जग कीए तब ।२३।

तही तिनै बाधे दुइ पुरवा । एक कसूर दुतीय लहुरवा ।  
अधक पुरी ते दोऊ बिराजी । निरखि लंक अमरावति लाजी ।२४।  
बहुत काल तिन राजु कमायो । जाल काल ते अंति फसायो ।  
तिन के पुत्र पौत्र जे वए । राज करत इह जग को भए ।२५।  
कहा लगे ते बरन सुनाऊं । तिन के नाम न संखिआ पाऊं ।  
होत चहूं जुग मै जे आए । तिन के नाम न जात गनाए ।२६।  
जो अब तव किरपा बल पाऊं । नाम जथा मति भाखि सुनाऊं ।  
काल केत अरु कालराइ भनि । जिन के भए पुत्र घरि अनगन ।२७।

काल केत भयो बली अपारा । कालराइ जिनि नगर निकारा ।  
भाजि सनौढ देसि ते गए । तही भूपजा बिहाअत भए ।२८।  
तिह ते पुत्र भयो जो धामा । सोढी राइ धरा तिहि नामा ।  
बंस सनौढ तदिन ते थीआ । परम पवित्र पुरख जू कीआ ।२९।

ता ते पुत्र पौत्र हुइ आइ । ते सोढी सभ जगति कहाए ।  
जग मै अधिक सु भए प्रसिधा । दिन दिन तिन के धन की ब्रिधा ।३०।  
राज करत भए बिबिध प्रकारा । देस देस के जीत त्रिपारा ।  
जहा तहा तिह धरम चलायो । अत्र पत्र कह सीसि दुरायो ।३१।  
राजसूअ बहु बारन कीए । जीति जीति देसेस्वर लीए ।  
बाजमेध बहु बारन करे । सकल कलूख निज कुल के हरे ।३२।  
बहुत बंस मै बढो बिखाधा । मेट न सका कोऊ तिह साधा ।  
बिचरे बीर बनैतु अखंडल । गहि गहि चले भिरन रन मंडल ।३३।

धन अरु भूमि पुरातन बैरा । जिन का मूआ करति जग घेरा ।  
मोह बाद अहंकार पसारा । काम क्रोध जीता जग सारा ।३४।

### दोहरा

धनि धनि धन को भाखीऐ जा का जगतु गुलामु ।  
सभ निरखत या को फिरै सभ चल करत सलाम ।३५।

### चौपई

काल न कोऊ करन सुमारा । बैर बाद अहंकार पसारा ।  
लोभ मूल इह जग को हूआ । जा सो चाहत सभै को मूआ ।३६।

इति श्री बचित्र नाटक ग्रंथे सुभ बंस बरननं दुतीया  
धिआइ संपूरनम सतु सुभम सतु ।२।१३७।

### भुजंग प्रयात छंद

रचा बैर बादं बिधाते अपारं । जिसै साधि साकिओ न कोऊ सुधारं ।  
बली काम रायं महा लोभ मोहं । गयो कउन बीरं सु या ते अलोहं ।१।  
तहा बीर बंके बकै आप मधं । उठे ससत्र लै लै मचा जुध सुधं ।  
कहूं खपरी खोल खंडे अपारं । मचै बीर बैताल डउरु डकारं ।२।

कहूं ईस सीसं पुऐ रुंड मालं । कहूं डाक डउरु कहूंकं बितालं ।  
चवी चावडीअं किलंकार कंकं । गुथी लुथ जुथे बहै बीर बंकं ।३।  
परी कुट कुटं रुले तछ मुछं । रहे हाथ डारे उभै उरध मुछं ।  
कहूं खोपरी खोल खिंगं खतंगं । कहूं खत्रीअं खग खेतं निखंगं ।४।

चवी चांवडी डाकनी डाक मारै । कहूं भैरवी भूत भैरो बकारै ।  
कहूं बीर बैताल बंके बिहारं । कहूं भूत प्रेतं हसै मासहारं ।५।

### रसावल छंद

महा बीर गजे । सुण मेघ लजे ।  
झंडा गड गाढे । मंडे रोस बाढे ।६।

क्रिपाणं कटारं । भिरे रोस धारं ।  
 महाबीर बंकं । भिरे भूमि हंकं ।७।  
 मचे सूर ससत्रं । उठी झार असत्रं ।  
 क्रिपाणं कटारं । परी लोह मारं ।८।

भुजंग प्रयात छंद

हलबी जुनबी सरोही दुधारी ।  
 बही कोप काती क्रिपाणं कटारी ।  
 कहूं सैहथीअं कहूं सुध सेलं ।  
 कहूं सेल सांगं भली रेल पेलं ।९।

नराज छंद

सरोख सुर साजिअं । बिसारि संक बाजिअं ।  
 निसंक ससत्र मारहीं । उतारि अंग डारहीं ।१०।  
 कछू न कान राखीं । सु मारि मारि भाखहीं ।  
 सु हाक हाठ रेलियं । अनंत ससत्र झेलियं ।११।

हजार हूरि अंबरं । बिरुध कै सुअंबरं ।  
 करूर भात डोलही । सु मारु मार बोलही ।१२।  
 कहूकि अंग कटीअं । कहूं सरोह पटीअं ।  
 कहूं समास मुछीअं । गिरे सु तछ मुछीअं ।१३।

ढमक ढोल ढालियं । हरोल हाल चालियं ।  
 झटाक झट बाहीअं । सु बीर सैन गाहीअं ।१४।  
 निवं निसाण बाजिअं । सु बीर धीर गाजिअं ।  
 क्रिपाल बाण बाही ही । अजात अंग लाह ही ।१५।

बिरुध क्रुध राजियं । न चार पैर भाजियं ।  
 संभारि ससत्र गाज ही । सु नाद मेघ लाज ही ।१६।  
 हलंक हाक मार ही । सरक ससत्र झार ही ।  
 भिरे बिसारि सोकियं । सिधार देव लोकियं ।१७।  
 रिसे बिरुध बीरियं । सु मारि झारि तीरियं ।  
 सबद संख बजियं । सु बीर धीर सजियं ।१८।

तुरी संख बाजे । महाबीर साजे ।  
 नचे तुंद ताजी । मचे सूर गाजी ।१९।  
 झिमी तेज तेगं । मनो बिज बेगं ।  
 उठै नद नादं । धुन त्रिबिखादं ।२०।  
 तुटे खग खोलं । मुखं मार बोलं ।  
 धका धीक धकं । गिरे हक बकं ।२१।  
 दलं दीह गाहं । अधो अंग लाहं ।  
 प्रयोधं प्रहारं । बकै मार मारं ।२२।  
 नदी रक्त पूरं । फिरी गैणि हूरं ।  
 गजे गैणि काली । हसी खपराली ।२३।  
 महा सूर सोहं । मंडे लोह क्रोहं ।  
 महा गरब गजियं । धुणं मेघ लजियं ।२४।  
 छके लोह छकं । मुखं मार बकं ।  
 मुखं मुछ बकं । भिरे छाड संकं । २५।  
 हकं हाक बाजी । धिरी सैण साजी ।  
 चिरे चार ढूके । मुखं मार कूके ।२६।  
 रुके सूर संगं । मनो सिंधु गंगं ।  
 ढहे ढाल ढकं । क्रिपाण कडकं ।२७।  
 हकं हाक बाजी । नचे तुंद ताजी ।  
 रसं रुद्र पागे । भिरे रोस जागे ।२८।  
 गिरे सुध सेलं । भई रेल पेलं ।  
 पलंहार नचे । रणं बीर मचे । २९।  
 हसे मासहारी । नचे भूत भारी ।  
 महा ढीठ ढूके । मुखं मार कूके ।३०।  
 गजै गैण देवी । महा अंस भेवी ।  
 भले पूत नाचं । रसं रुद्र राचं ।३१।  
 भिरै बैर रुझै । महा जोध जुझै ।  
 झंडा गड गाढे । बजे बैर बाढे ।३२।  
 गजं गाह बाधे । धनुर बान साधे ।  
 बहे आप मधं । गिरे अध अधं । ३३।

गजं बाज जुझै । बली बैर रुझै ।  
 त्रिभै ससत्र बाहै । उभै जीत चाहै ।३४।  
 गजे आनि गाजी । नचे तुंद ताजी ।  
 हकं हाक बजी । फिरै सैन भजी ।३५।

मदं मत माते । रसं रुद्र राते ।  
 गजं जूह साजे । भिरे रोस बाजे ।३६।  
 झमी तेज तेगं । घणं बिज बेगं ।  
 बहै बार बैरी । जलं जिउ गंगैरी ।३७।  
 अपो आप बाहं । उभै जीत चाहं ।  
 रसं रुद्र राते । महा मत माते ।३८।

### भुजंग छंद

मचे बीर बीरं अभूतं भयाणं । बजी भेरि भंकार धुके निसानं ।  
 नवं नद नीसाण गजे गहीरं । फिरै रुंड मुंड तनं तछ तीरं ।३९।

बहे खग खेतं खिआलं खतंगं । रुले तछ मुछं महा जोध जंगं ।  
 बंधै बीर बाना बडे ऐठिवारे । घुमै लोह घुटं मनो मतवारे ।४०।

उठी कूह जूहं समरि सार बजियं । किधो अंत के काल को मेघ गजियं ।  
 भई तीर भीरं कमाणं कड़कियं । बजे लोह क्रोहं महा जंगि मचियं ।४१।

बिरचे महा जुध जोधा जुआणं । खुले खग खत्री अभूतं भयाणं ।  
 बली जुझ रुझै रसं रुद्र रते । मिले हथ बखं महा तेज तते । ४२।

झमी तेज तेगं सु रोसं प्रहारं । रुले रुंड मुंडं उठी ससत्र झारं ।  
 बबकंत बीरं भभकंत घायं । मनो जुध इंद्रं जुटियो ब्रितरायं ।४३।

महा जुध मचियं महा सूर गाजे । आपो आप मै ससत्र सों ससत्र बाजे ।  
 उठे झार सांगं मचे लोह क्रोहं । मनो खेल बासंत माहंत सोहं ।४४।

## रसावल छंद

जिते बैर रुझं । तिते अंति जुझं ।  
 जिते खेति भाजे । तिते अंति लाजे ।४५।  
 तुटे देह बरमं । छुटी हाथ चरमं ।  
 कहुं खेति खोलं । गिरे सूर टोलं ।४६।  
 कहुं मुछ मुखं । कहुं ससत्र सखं ।  
 कहुं खोल खगं । कहुं परम पगं ।४७।  
 गहे मुछ बंकी । मंडे आन हंकी ।  
 ढका ढुक ढालं । उठे हाल चालं ।४८।

## भुजंग प्रयात छंद

खुले खग खूनी महाबीर खेतं ।  
 नचे बीर बैतालयं भूत प्रेतं ।  
 बजे डंग डउरू उठे नाद संखं ।  
 मनो मल जुटे म्हा हथ बखं ।४९।

## छपै छंद

जिनि सूरन संग्राम सबल समुहि ह्वै मंडिओ ।  
 तिन सुभटन ते एक काल कोऊ जीअत न छडिओ ।  
 सब खत्री खग खंडि खेति ते भू मंडप अहुटे ।  
 सार धारि धरि धूम मुकति बंधन ते छुटे ।  
 ह्वै टूक टूक जुझे सबै पाव न पाछे डारीयं ।  
 जै कार अपार सुधार हूंअ बासव लोक सिधारीयं ।५०।

## चौपई

इह बिधि मचा घोर संग्रामा । सिधए सूर सुर के धामा ।  
 कहा लगै वह कथो लराई । आपन प्रभा न बरनी जाई ।५१।

## भुजंग प्रयात छंद

लवी सरब जीते कुसी सरब हारे । बचे जे बली प्रान लै के सिधारे ।  
 चतुर बेद पठियं कीयो कासि बासं । घने बरख कीने तहा ही निवासं ।५२।

इति श्री बचित्र नाटक ग्रंथे लवी कुस जुध बरननं त्रितीया  
 धिआउ समापतम सतु सुभम सतु ।३।१८९।

### भुजंग प्रयात छंद

जिनै बेद पठियो सु बेदी कहाए । तिनै धरम कै करम नीके चलाए ।  
पठे कागदं मद्र राजा सुधारं । आपो आप मो बैर भावं बिसारं ।१।

त्रिपं मुकलियं दूत सो कासि आयं । सबे बेदियं भेद भाखे सुनायं ।  
सबै बेद पाठी चले मद्र देसं । प्रनाम कीयो आन कै कै नरेसं ।२।

धुनं बेद की भूप ता ते कराई । सबै पास बैठे सबा बीच भाई ।  
पड़े साम बेद जुजर बेद कथं । रिगं बेद पठियं करे भाव हथं ।३।

### रसावल छंद

अथर्व बेद पठियं । सुनै पाप नठियं ।  
रहा रीझ राजा । दीआ सरब साजा ।४।  
लयो बन बासं । महा पाप नासं ।  
रिखं भेस कीयं । तिसै राज दीयं ।५।  
रहे होरि लोगं । तजे सरब सोगं ।  
धनं धाम तिआगे । प्रभं प्रेम पागे ।६।

### अडिल

बेदी भयो प्रसंन राज कह पाइकै । देत भयो बरदान हीऐ हुलसाइकै ।  
जब नानक कल मै हम आनि कहइ है । हो जगत पूज करि तोहि परम पदु पाइ है ।७।

### दोहरा

लवी राज दे बनि गहे बेदीअन कीनो राज ।  
भाति भाति तनि भोगीयं भूअ का सकल समाज ।८।

### चौपई

त्रितीय बेद सुनबे तुम कीआ । चतुर बेद सुनि भूअ को दीआ ।  
तीन जनम हमहूं जब धरि है । चौथे जनम गुरू तुहि करि है ।९।  
उत राजा काननहि सिधायो । इत इन राज करत सुख पायो ।  
कहा लगे करि कथा सुनाऊ । ग्रंथ बढन ते अधिक डराऊ ।१०।

इति श्री बचित्र नाटक ग्रंथे बेद पाठ भेट राज चतुरथ  
धिआइ समापतम सतु सुभम सतु ।४।१९९।

## नराज छंद

बहुरि बिखाध बाधियं । किनी न ताहि साधियं ।  
करंम काल यो भई । सु भूमि बंस ते गई ।१।

## दोहरा

बिप्र करत भए सूद्र ब्रिति छत्री बैसन करम ।  
बैस करत भए छत्रि ब्रिति सूद्र सु दिज को धरम ।२।

## चौपई

बीस गाव तिन के रहि गए । जिन मो करत क्रिसानी भए ।  
बहुत काल इह भाति बितायो । जनम समै नानक को आयो ।३।

## दोहरा

तिन बेदीयन की कुल बिखे प्रगटे नानक राइ ।  
सभ सिखन को सुख दए जह तह भए सहाइ ।४।

## चौपई

तिन इह कल मो धरम चलायो । सभ साधन को राहु बतायो ।  
जो ताके मारग महि आए । ते कबहूं नहि पाप संताए ।५।  
जे जे पंथ तवन के परे । पाप ताप तिन के प्रभ हरे ।  
दूख भूख कबहूं न संताए । जाल काल के बीच न आए ।६।

नानक अंगद को बपु धरा । धरम प्रचुरि इह जग मो करा ।  
अमर दास पुनि नाम कहायो । जनु दीपक ते दीप जगायो ।७।  
जब बरदानि समै वहु आवा । रामदास तब गुरु कहावा ।  
तिह बरदानि पुरातनि दीआ । अमरदासि सुरपुरि मग लीआ ।८।

श्री नानक अंगदि करि माना । अमर दास अंगद पहिचाना ।  
अमर दास रामदास कहायो । साधन लखा मूड़ नहि पायो ।९।

भिंन भिंन सभहूं करि जाना । एक रूप किनहूं पहिचाना ।  
जिन जाना तिन ही सिधि पाई । बिनु समझे सिधि हाथि न आई ।१०।

रामदास हरि सो मिलि गए । गुरता देत अरजुनहि भए ।  
जब अरजुन प्रभ लोकि सिधाए । हरि गोबिंद तिह ठा ठहराए ।११।  
हरिगोबिंद प्रभ लोकि सिधारे । हरी राइ तिह ठा बैठारे ।  
हरी क्रिसनि तिन के सुत वए । तिन ते तेग बहादुर भए ।१२।

तिलक जंझू राखा प्रभ ताका । कीनो बडो कलू महि साका ।  
साधन हेति इती जिनि करी । सीसु दीया परु सी न उचरी ।१३।  
धरम हेत साका जिनि कीआ । सीसि दीआ परु सिररु न दीआ ।  
नाटक चेटक कीए कुकाजा । प्रभ लोगन कह आवत लाजा ।१४।

### दोहरा

ठीकर फोरि दिलीस सिरि प्रभ पुरि कीया पयान ।  
तेग बहादुर सी क्रिआ करी न किनहूं आनि ।१५।  
तेग बहादुर के चलत भयो जगत को सोक ।  
है है है सभ जग भयो जै जै जै सुर लोकि ।१६।

इति श्री बचित्र नाटक ग्रंथे पातसाही बरननं नाम पंचमो  
धिआउ समापतम सतु सुभम सतु ।५।२१५।

### चौपई

अब मै अपनी कथा बखानो । तप साधत जिह बिधि मुहि आनो ।  
हेम कुंट परबत है जहां । सपत स्त्रिंग सोभित है तहां ।१।  
सपतस्त्रिंग तिह नामु कहावा । पंडु राज जह जोगु कमावा ।  
तह हम अधिक तपसिआ साधी । महाकाल कालका अराधी ।२।

इह बिधि करत तपसिआ भयो । द्वै ते एक रूप ह्वै गयो ।  
तात मात मुर अलख अराधा । बहु बिधि जोग साधना साधा ।३।  
तिन जो करी अलख की सेवा । ता ते भए प्रसंनि गुरदेवा ।  
तिन प्रभ जब आइसु मुहि दीआ । तब हम जनम कलू महि लीआ ।४।

चित न भयो अमरो आवन कहि । चुभी रही स्त्रुति प्रभु चरनन महि ।  
जिउ तिउ प्रभ हम को समझायो । इम कहि कै इह लोक पठायो ।५।

अकाल पुरख बाच इस कीट प्रति  
चौपई

जब पहिले हम स्रिसटि बनाई । दर्इत रचे दुसट दुख दाई ।  
ते भुज बल बवरे ह्वै गए । पूजत परम पुरुख रहि गए ।६।  
ते हम तमकि तनिक मो खापे । तिन की ठउर देवता थापे ।  
ते भी बलि पूजा उरझाए । आपन ही परमेसुर कहाए ।७।

महादेव अचुत कहवायो । बिसन आप ही को ठहरायो ।  
ब्रहमा आप पारब्रहम बखाना । प्रभ को प्रभू न किनहूं जाना ।८।  
तब साखी प्रभ असट बनाए । साख नमित देबे ठहिराए ।  
ते कहै करो हमारी पूजा । हम बिनु अवरु न ठाकुरु दूजा ।९।

परम तत को जिन न पछाना । तिन करि ईसुर तिन कहु माना ।  
केते सूर चंद कहु मानै । अगनहोतु कई पवन प्रमानै ।१०।  
किन हूं प्रभु पाहिन पहिचाना । न्हात किते जल करत बिधाना ।  
केतिक करम करत डरपाना । धरम राज को धरम पछाना ।११।

जे प्रभ साख नमित ठहराए । ते हिआं आइ प्रभू कहवाए ।  
ताकी बात बिसर जाती भी । अपनी अपनी परत सोभ भी ।१२।  
जब प्रभ को न तिनै पहिचाना । तब हरि इन मनुछन ठहराना ।  
ते भी बसि ममता हुइ गए । परमेसुर पाहन ठहरए ।१३।

तब हरि सिध साध ठहिराए । तिन भी परम पुरखु नहि पाए ।  
जे कोई होति भयो जगि सिआना । तिन तिन अपनो पंथु चलाना ।१४।  
परम पुरुख किनहूं नह पायो । बैर बाद हंकार बढायो ।  
पेड पात आपन ते जलै । प्रभ कै पंथ न कोऊ चलै ।१५।

जिनि जिनि तनिकि सिध को पायो । तिनि तिनि अपना राहु चलायो ।  
परमेसुर न किनहूं पहिचाना । मम उचारि ते भयो दिवाना ।१६।  
परमतत किनहूं न पछाना । आप आप भीतरि उरझाना ।  
तब जे जे रिखि राज बनाए । तिन आपन पुनि सिंम्रित चलाए ।१७।

जे सिंम्रतन के भए अनुरागी । तिन तिन क्रिआ ब्रहम की तिआगी ।  
 जिन मनु हर चरनन ठहरायो । सो सिंम्रितन के राह न आयो ।१८।  
 ब्रहमा चार ही बेद बनाए । सरब लोक तिह करम चलाए ।  
 जिन की लिव हरि चरनन लागी । ते बेदन ते भए तिआगी ।१९।

जिन मति बेद कतेबन तिआगी । पारब्रहम के भे अनुरागी ।  
 तिन के गूड़ मति जे चलही । भाति अनेक दूख सो दलही ।२०।  
 जे जे सहित जातन संदेहि । प्रभ के संगि न छोडत नेह ।  
 ते ते परम पुरी कहि जाही । तिन हरि सिउ अंतरु किछु नाही ।२१।

जे जे जीय जातन ते डरे । परम पुरुख तजि तिन मगि परे ।  
 ते ते नरक कुंड मो परही । बार बार जग मो बपु धरही ।२२।  
 तब हरि बहुरि दत उपजाइयो । तिन भी अपना पंथु चलाइयो ।  
 कर मो नख सिर जटा सवारी । प्रभ की क्रिआ कछु न बिचारी ।२३।

पुनि हरि गोरख को उपराजा । सिख करे तिन हू बड राजा ।  
 स्रवन फारि मुद्रा दुऐ डारी । हरि की प्रति रीति न बिचारी ।२४।  
 पुनि हरि रामानंद को करा । भेस बैरागी को जिनि धरा ।  
 कंठी कंठि काठ की डारी । प्रभ की क्रिआ न कछू बिचारी ।२५।

जे प्रभ परम पुरुख उपजाए । तिन तिन अपने राह चलाए ।  
 महादीन तबि प्रभ उपराजा । अरब देस को कीनो राजा ।२६।  
 तिन भी एकु पंथु उपराजा । लिंग बिना कीने सभ राजा ।  
 सभ ते अपना नामु जपायो । सति नामु काहूं न द्रिड़ायो ।२७।

सभ अपनी अपनी उरझाना । पारब्रहम काहूं न पछाना ।  
 तप साधत हरि मोहि बुलायो । इम कहि कै इह लोक पठायो ।२८।

अकाल पुरुख बाच

चौपई

मै अपना सुत तोहि निवाजा । पंथु प्रचुर करबे कह साजा ।  
 जाहि तहा तै धरमु चलाइ । कबुधि करन ते लोक हटाइ ।२९।

ठाढ भयो मै जोरि कर बचन कहा सिर नयाइ ।  
पंथ चलै तब जगत मै जब तुम करहु सहाइ ।३०।

## चौपई

इह कारनि प्रभ मोहि पठायो । तब मै जगति जनमु धरि आयो ।  
जिम तिन कही इनै तिम कहिहौ । अउर किसु ते बैर न गहिहौ ।३१।  
जे हम को परमेशुर उचरि है । ते सभि नरकि कुंड महि परि है ।  
मो को दासु तवन का जानो । या मै भेदु न रंच पछानो ।३२।  
मै हो परम पुरख को दासा । देखनि आयो जगत तमासा ।  
जो प्रभ जगति कहा सो कहि हो । म्रित लोग ते मोनि न रहि हो ।३३।

## नराज छंद

कहियो प्रभु सु भाखिहौ । किसु न कान राखिहौ ।  
किसु न भेख भीजहौ । अलेख बीज बीजहौ ।३४।  
पखाण पूजिहौ नही । न भेख भीजहौ कही ।  
अनंत नामु गाइहौ । परम पुरुख पाइहौ ।३५।

जटा न सीस धारिहौ । न मुंद्रका सु धारिहौ ।  
न कानि काहूं की धरो । कहियो प्रभु सु मै करो ।३६।  
भजो सु एकु नामयं । जु काम सरब ठामयं ।  
न जाप आन को जपो । न अउर थापना थपो ।३७।

बिअंति नामु धिआइहौ । परम जोति पाइहौ ।  
न धिआन आन को धरो । न नामु आनि उचरो ।३८।  
तविक नाम रतियं । न आन मान मतियं ।  
परम धिआन धारीयं । अनंत पाप टारीयं ।३९।  
तुमेव रूप राचियं । न आन दान माचियं ।  
तविक नामु उचारीयं । अनंत दूख टारीयं ।४०।

## चौपई

जिनि जिनि नामु तिहारो धिआइआ । दूख पाप तिन निकटि न आइआ ।  
जे जे अउर धिआन को धरही । बहिसि बहिसि बादन ते मरही ।४१।

हम इह काज जगत मो आए । धरम हेत गुरदेवि पठाए ।  
 जहा तहा तुम धरम बिथारो । दुसट दोखयनि पकरि पछारो ।४२।  
 याही काज धरा हम जनमं । समझ लेहु साधू सभ मनमं ।  
 धरम चलावन संत उबारन । दुसट सभन को मूल उपारिन ।४३।

जे जे भए पहिल अवतारा । आपु आपु तिन जापु उचारा ।  
 प्रभ दोखी कोई न बिदारा । धरम करन को राहु न डारा । ४४।  
 जे जे गउस अंबीआ भए । मै मै करत जगत ते गए ।  
 महापुरुख काहूं न पछाना । करम धरम को कछू न जाना ।४५।  
 अवरन की आसा किछु नाही । एकै आस धरो मन माही ।  
 आन आस उपजत किछु नाही । वा की आस धरो मन माही ।४६।

### दोहरा

कोई पड़ति कुरान को कोई पड़त पुरान ।  
 काल न सकत बचाइकै फोकट धरम निदान ।४७।

### चौपई

कई कोटि मिलि पड़त कुराना । बाचत किते पुरान अजाना ।  
 अंति कालि कोई काम न आवा । दाव काल काहूं न बचावा ।४८।

किउ न जपो ता को तुम भाई । अंति कालि जो होइ सहाई ।  
 फोकट धरम लखो कर भरमा । इन ते सरत न कोई करमा ।४९।

इह कारनि प्रभ हमै बनायो । भेदु भाखि इह लोक पठायो ।  
 जो तिन कहा सु सभन उचरो । डिंभ विंभ कछु नैकु न करो ।५०।

### रसावल छंद

न जटा मूंडि धारौ । न मुंद्रका सवारौ ।  
 जपो तास नामं । सरै सरब कामं ।५१।  
 न नैनं मिचाउ । न डिंभं दिखाउ ।  
 न कुकरमं कमाउ । न भेखी कहाउ ।५२।

### चौपई

जे जे भेख सु तन मै धारै । ते प्रभ जन कछु कै न बिचारै ।  
 समझ लेहु सभ जन मन माही । डिंभन मै परमेसुर नाही ।५३।

जे जे करम करि डिंभ दिखाही । तिन परलोकन मो गति नाही ।  
जीवत चलत जगत के काजा । स्वांग देखि करि पूजत राजा ।५४।

सुआंगन मै परमेसुर नाही । खोजि फिरै सभ ही को काही ।  
अपनो मनु कर मो जिह आना । पारब्रहम को तिनी पछाना ।५५।

### दोहरा

भेख दिखाए जगत को लोगन को बसि कीन ।  
अंति कालि काती कटियो बासु नरक मो लीन ।५६।

### चौपई

जे जे जग को डिंभ दिखावै । लोगन मूंडि अधिक सुख पावै ।  
नासा मूंद करै परणामं । फोकट धरम न कउडी कामं ।५७।  
फोकट धरम जिते जग करही । नरकि कुंड भीतर ते परही ।  
हाथ हलाए सुरगि न जाहू । जो मनु जीत सका नहि काहू ।५८।

### कबिबाच

#### दोहरा

जो निज प्रभ मो सो कहा सो कहिहो जग माहि ।  
जो तिह प्रभ को धिआइ है अंति सुरग को जाहि ।५९।

#### दोहरा

हरि हरि जन दुई एक है बिब बिचार कछु नाहि ।  
जल ते उपजि तरंग जिउ जल ही बिखै समाहि ।६०।

#### चौपई

जे जे बादि करत हंकारा । तिन ते भिन रहत करतारा ।  
बेद कतेब बिखै हरि नाही । जान लेहु हरि जन मन माही ।६१।  
आंख मूंदि कोऊ डिंभ दिखावै । आंधर की पदवी कह पावै ।  
आंखि मीच मगु सूझि न जाई । ताहि अनंत मिलै किम भाई ।६२।

बहु बिसथार कह लउ कोई कहै । समझत बाति थकति हुऐ रहे ।  
रसना धरै कई जो कोटा । तदपि गनत तिह परत सु तोटा ।६३।

जब आइसु प्रभ को भयो जनमु धरा जग आइ ।  
अब मै कथा संछेप ते सबहूं कहत सुनाइ ।६४।

इति श्री बचित्र नाटक ग्रंथे मम आगिआ काल जग प्रवेस करनं  
नाम खसटमो धियाइ समापतम सतु सुभम सतु ।६।२७९।  
अथ कबि जनम कथनं ।

## चौपई

मुर पित पूरबि कियसि पयाना । भाति भाति के तीरथि न्हाना ।  
जब ही जाति त्रिबेणी भए । पुंन दान दिन करत बितए ।१।  
तही प्रकास हमारा भयो । पटना सहर बिखै भव लयो ।  
मद्र देस हम को ले आए । भाति भाति दाईअन दुलराए ।२।  
कीनी अनिक भाति तन रछा । दीनी भाति भाति की सिछा ।  
जब हम धरम करम मो आइ । देव लोकि तब पिता सिधाए ।३।

इति श्री बचित्र नाटक ग्रंथे कबि जनम बरननं नाम सपतमो  
धियाइ समापतम सतु सुभम सतु ।७।२८२।  
अथ राज साज कथनं

## चौपई

राज साज हम पर जब आयो । जथा सकति तब धरमु चलायो ।  
भाति भाति बनि खेलि सिकारा । मारे रीछ रोझ झंखारा ।१।  
देस चाल हम ते पुनि भई । सहर पावटा की सुधि लई ।  
कालिंद्री तटि करे बिलासा । अनिक भाति के पेखि तमासा ।२।  
तह के सिंघ घने चुनि मारे । रोझ रीछ बहु भाति बिदारे ।  
फते साह कोपा तबि राजा । लोह परा हम सो बिनु काजा ।३।

## भुजंग प्रयात छंद

तहा साह श्रीसाह संग्राम कोपे । पंचो बीर बंके प्रिथी पाइ रोपे ।  
हठी जीतमलं सु गाजी गुलाबं । रणं देखीए रंग रूपं सहाबं ।४।  
हठियो माहरीचंदयं गंगरामं । जिने कितीयं जितीयं फौज तामं ।  
कुपे लाल चंदं कीए लाल रूपं । जिने गंजीयं गरब सिंघ अनूपं ।५।

कुपियो माहरू काहरू रूप धारे । जिने खान खावीनीयं खेत मारे ।  
कुपियो देवतेसं दयाराम जुधं । कीयं द्रोण की जिउ महा जुध सुधं ।६।

क्रिपाल कोपीयं कुतको संभारी । हठी खान हयात के सीस झारी ।  
 उठी छिछि इछं कढा मेझ जोरं । मनो माखनं मटकी कान्ह फोरं ।७।  
 तहा नंद चंदं कीयो कोप भारो । लगाई बरछी क्रिपाणं संभारो ।  
 तुटी तेग त्रिखी कढे जमदढं । हठी राखीयं लज बंसं सनढं ।८।

तहा मातलेयं क्रिपालं क्रुधं । छकियो छोभ छत्री करियो जुध सुधं ।  
 सहे देह आपं महाबीर बाणं । करियो खान बानीन खाली पलाणं ।९।  
 हठियो साहिबं चंद खेतं खत्रिआणं । हने खान खूनी खुरासान भानं ।  
 तह बीर बंके भली भाति मारे । बचे प्रान लै के सिपाही सिधारे ।१०।

तहा साह संग्राम कीने अखारे । घने खेत मो खान खूनी लतारे ।  
 त्रिपं गोपलायं खरो खेत गाजै । म्रिगा झुंड मधियं मनो सिंघ राजे ।११।

तहा एक बीरं हरी चंद कोप्यो । भली भाति सो खेत मो पाव रोप्यो ।  
 महा क्रोध के तीर तीखे प्रहारे । लगै जौनि के ताहि पारे पधारे ।१२।

### रसावल छंद

हरी चंद क्रुधं । हने सूर सुधं ।  
 भले बाण बाहे । बडे सैन गाहे ।१३।  
 रसं रुद्र राचे । महा लोह माचे ।  
 हने ससत्र धारी । लिटे भूप भारी ।१४।

तबै जीत मलं । हरी चंद भलं ।  
 ह्रिदै ऐंच मारियो । सु खेतं उतारियो । १५  
 लगे बीर बाणं । रिसियो तेजि माणं ।  
 समूह बाज डारे । सुवरगं सिधारे ।१६।

### भुजंग प्रयात छंद

खुलै खान खूनी खुरासान खगं । परी ससत्र धारं उठी झाल अगं ।  
 भई तीर भीरं कमाणं कड़के । गिरे बाज ताजी लगे धीर धके ।१७।  
 बजी भेर भुंकार धुके नगारे । दुहूं उरते बीर बंके बकारे ।  
 करे बाहु आघात ससत्रं प्रहारं । डकी डाकणी चावडी चीतकारं ।१८।

## दोहरा

कहा लगे बरनन करौ मचियो जुधु अपार ।  
जे लुझे जुझे सबै भजे सूर हजार ।१९।

## भुजंग प्रयात छंद

भजियो साह पाहाड़ ताजी त्रिपायं । चलियो बीरीया तीरीया न चलायं ।  
जसो डढवालं मधुकर सु साहं । भजे संगि लै के सु सारी सिपाहं ।२०।

चक्रत चौपियो चंद गाजी चंदेलं । हठी हरी चंदं गहे हाथ सेलं ।  
करियो सुआम धरम महा रोस रुझियं । गिरियो टूक टूक ह्वै इसो सूर झुझियं ।२१।

तहा खान नैजाबतै आन कै कै । हनियो साह संग्राम को ससत्र लै कै ।  
कितै खान बानीन हूं अस्त्र झारे । सही साह संग्राम सुरगं सिधारे । २२।

## दोहरा

मारि निजाबत खान को संगो जुझै जुझार ।  
हा हा इह लोकै भइओ सुरग लोक जैकार ।२३।

## भुजंग प्रयात छंद

लखै साह संग्राम जुझे जुझारं । तवं कीट बाणं कमाणं संभारं ।  
हनियो एक खानं खिआलं खतंगं । डसियो सत्र को जानु स्यामं भुजंग ।२४।

गिरियो भूमि सो बाण दूजो संभारियो । मुखं भीखनं खान के तानि मारियो ।  
भजियो खान खूनी रहियो खेति ताजी । तजे प्राण तीजे लगै बाण बाजी ।२५।

छुटी मूरछना हरी चंदं संभारो । गहे बाण कामाण भे ऐच मारे ।  
लगे अंगि जा के रहे न संभारं । तनं तिआग ते देव लोकं पधारं ।२६।

दुयं बाण खैचे इकं बारि मारे । बली बीर बाजीन ताजी बिदारे ।  
जिसै बान लागै रहे न संभारं । तनं बेधि कै ताहि पारं सिधारं ।२७।

सबै स्वाम धरमं सु बीरं संभारे । डकी डाकणी भूत प्रेतं बकारे ।  
 हसै बीर बैताल औ सुध सिधं । चवी चावंडीयं उडी गिध ब्रिधं ।२८।  
 हरीचंद कोपे कमाणं संभारं । प्रथम बाजीयं ताण बाणं प्रहारं ।  
 दुतीय ताक कै तीर मो को चलायो । रखियो दर्इव मै कानि छ्वैकै सिधायं ।२९।

त्रितीय बाण मारियो सु पेटी मझारं । बिधिअं चिलकतं दुआल पारं पधारं ।  
 चुभी चिंच चरमं कछू घाइ न आयं । कलं केवलं जान दासं बचायं ।३०।

### रसावल छंद

जबै बाण लाग्यो । तबै रोस जाग्यो ।  
 कर लै कमाणं । हनं बाण ताणं ।३१।  
 सबै बीर धाए । सरोघं चलाए ।  
 तबै ताकि बाणं । हन्यो एक जुआणं ।३२।  
 हरी चंद मारे । सु जोधा लतारे ।  
 सु कारोड़ रायं । वहै काल घायं ।३३।

रणं तिआगि भागे । सबै त्रास पागे ।  
 भई जीत मेरी । क्रिपा काल केरी ।३४।  
 रणं जीत आए । जयं गीत गाए ।  
 धनंधार बरखे । सबै सूर हरखे ।३५।

### दोहरा

जुध जीत आए जबै टिकै न तिन पुर पाव ।  
 काहलूर मै बाधियो आनि अनंद पुर गाव ।३६।  
 जे जे नर तह न भिरे दीने नगर निकार ।  
 जे तिह ठउर भले भिरे तिने करी प्रतिपार ।३७।

### चौपई

बहत दिवस इह भाति बिताए ।  
 संत उबारि दुसट सभ घाए ।  
 टांग टांग करि हने निदाना ।  
 कूकर जिमि तिन तजे प्राणा ।३८।

इति स्त्री बचित्र नाटक ग्रंथे राज साज कथनं भंगाणी जुध बरननं  
 नाम असटमो धियाइ समापतं सतु सुभम सतु ।८।३२०।

बहुत काल इह भाति बितायो । मीआ खान जंमू कह आयो ।  
 अलिफ खान नादौण पठावा । भीमचंद तन बैर बढावा ।१।  
 जुध काज त्रिप हमै बुलायो । आपि तवन की ओर सिधायो ।  
 तिन कठ गड़ नवरस पर बाधो । तीर तुफंग नरेसन साधो ।२।

### भुजंग प्रयात छंद

तहा राज सिंघ बली भीम चंदं । चड़िओ राम सिंघ महा तेजवंदं ।  
 सुखंदेव गाजी जसरोट राजं । चड़े क्रुध कीने करे सरब काजं ।३।  
 प्रिथीचंद चढिओ डढे डढवारं । चले सिध हुऐ कार राजं सुधारं ।  
 करी ढूक ढोअं किरपाल चंदं । हटाए सबे मारि कै बीर ब्रिंदं ।४।

दुतीय ढोअ ढूके वहै मारि उत्तारी । खरे दांत पीसे छुभै छत्रधारी ।  
 उतै वै खरे बीर बंबै बजावै । तरे भूप ठाढे बडो सोकु पावै ।५।  
 तबै भीमचंदं कीयो कोप आपं । हनूमान कै मंत्र को मुखि जापं ।  
 सबै बीर बोलै हमै भी बुलायं । तबै ढोअ कै कै सु नीकै सिधायं ।६।

सबै कोप कै कै महा बीर ढूकै । चलै बारिबै बार को जिउ भभूकै ।  
 तहा बिझुड़िआलं हठियो बीर दिआलं । उठियो सैन लै संगि सारी क्रिपालं ।७।

### मधुभार छंद

कुपियो क्रिपाल । नचे मराल । बजे बजंत । करूरं अनंत ।८।  
 जुझंत जुआण । बाहै क्रिपाण । जीअ धारि क्रोध । छडे सरोघ ।९।  
 लुझै निदाण । तजंत प्राण । गिर परत भूमि । जणु मेघ झूमि ।१०।

### रसावल चंद

क्रिपाल कोपियं । हठी पाव रोपियं ।  
 सरोघं चलाए । बडे बीर घाए ।११।  
 हणै छत्रधारी । लिटे भूप भारी ।  
 महा नाद बाजे । भले सूर गाजे ।१२।

क्रिपालं क्रुधं । कीयो जुध सुध्धं ।  
 महाबीर गजे । महा सार बजे ।१३।  
 करो जुध चंड । सुणियो नाव खंडं ।  
 चलियो ससत्र बाही । रजौती निबाही ।१४।

### दोहरा

कोप भरे राजा सबै कीनो जुध उपाइ ।  
 सैन कटोचन की तबै घेर लई अर राइ ।१५।

### भुजंग छंद

चले नांगलू पांगलू वेदडोलं । जसवारे गुलेरे चले बांध टोलं ।  
 तहा एक बाजियो महाबीर दिआलं । रखी लाज जौनै सबै बिझडवालं ।१६।  
 तवं कीट तौ लौ तुफंगं संभारो । ह्रिदै एक रावंत के तकि मारो ।  
 गिरियो झूमि भूमै करियो जुध सुधं । तऊ मारु बोल्यो महा मानि क्रोपं ।१७।

तजियो तुपकं बान पानं संभारे । चतुर बानयं लै सु सबियं प्रहारे ।  
 त्रियो बाण लै बाम पाणं चलाए । लगै या लगै ना कछू जानि पाए ।१८।  
 सु तउ लउ दईव जुध कीनो उझारं । तिनै खेद कै बारि के बीच डारं ।  
 परी मार बुंगं छुटी बाण गोली । मनो सूर बैठे भली खेल होली ।१९।

गिरे बीर भूमं सरं सांग पेलं । रंगे स्रोण बसत्रं मनो फाग खेलं ।  
 लीयो जीति बैरी कीआ आनि डेरं । तेऊ जाइ पारं रहे बारि केरं ।२०।  
 भई रात्रि गुबार के अरध जामं । तबै छोरिगे बार देवै दमामं ।  
 सबै रात्रि बीती उद्यो दिउस राणं । चले बीर चालाक खगं खिलाणं ।२१।

भज्यो अलिफ खानं न खाना संभारियो । भजे और बीरं न धीरं बिचारियो ।  
 नदी पै दिनं असट कीने मुकामं । भली भात देखै सबै राज धामं ।२२।

इत हम होइ बिदा घरि आए । सुलह नमित वै उतहि सिधाए ।  
संधि इनै उन कै संगि कई । हेत कथा पूरन इत भई ।२३।

## दोहरा

आलसून कह मारिकै इह दिसि कीयो पयान ।  
भाति अनेकन के करे पुरि अनंद सुख आनि ।२४।

इति स्त्री बचित्र नाटक ग्रंथे नदौन जुध बरननं नाम नौमो धियाइ  
समापतम सतु सुभम सतु ।१।३४४।

## चौपई

बहुत बरख इह भाति बिताए । चुनि चुनि चोर सबै गहि घाए ।  
केतकि भाजि सहिर ते गए । भूखि मरत फिरि आवत भए ।१।  
तब लौ खान दिलावर आए । पूत आपन हम ओरि पठाए ।  
द्वैक घरी बीती निसि जबै । चड़त करी खानन मिलि तबै ।२।

जब दल पार नदी के आयो । आनि आलमै हमै जगायो ।  
सोरु परा सभ ही नर जागे । गहि गहि ससत्र बीर रिस पागे ।३।  
छूटन लगी तुफंगै तबही । गहि गहि ससत्र रिसाने सबही ।  
क्रूर भाति तिन करी पुकारा । सोरु सुना सरता कै पारा ।४।

## भुजंग प्रयात छंद

बजी भैर भुंकार धुंके नगारे । महा बीर बानैत बंके बकारे ।  
भए बाहु आघात नचे मरालं । क्रिपा सिंधु काली गरजी करालं ।५।  
नदीयं लख्यो कालरात्र समानं । करे सूरमा सीति पिंगं प्रमानं ।  
इते बीर गजे भए नाद भारे । भजे खान खूनी बिना ससत्र झारे ।६।

## नराज छंद

निलज खान भजियो । किनी न ससत्र सजियो ।  
सु तिआग खेत को चले । सुबीर बीरहा भले ।७।  
चले तुरे तुराइ कै । सकै न ससत्र उठाइ कै ।  
न लै हथिआर गजही । निहारि नारि लजही ।८।

## दोहरा

बरवा गाउ उजार कै करे मुकाम भलान ।  
 प्रभ बल हमै न छुड़ सकै भाजत भए निदान ।९।  
 तव बलि ईहा न परे सकै बरवा हना रिसाइ ।  
 सालिन रस जिम बानीय रोरन खात बनाइ ।१०।

इति स्त्री बचित्र नाटक ग्रंथे खानजादे को आगमन त्रासित उठ जैबो बरननं नाम  
 दसमो धयाइ समापतम सतु सुभम सतु ।१०।३५४।

## हुसैनी जुध कथनं

## भुजंग प्रयात छंद

गयो खानजादा पिता पास भजं । सकै ज्वाबु दै न हने सूर लजं ।  
 तहा ठोकि बाहा हुसैनी गरजियं । सूर लै लै सिला साज सजियं ।१।  
 करियो जोरि सैनं हुसैनी पयानं । प्रथम कूटि कै लूट लीने अवानं ।  
 पुनरि डढवालं कीयो जीति जेरं । करे बंदि कै राज पुत्रान चेरं ।२।  
 पुनरि दून को लूट लीनो सुधारं । कोई सामुहे ह्वै सकियो न गवारं ।  
 लीयो छीन अनं दलं बाटि दीयं । महा मूड़ियं कुतसतं काज कीयं ।३।

## दोहरा

कितक दिवस बीतत भए करत उसै उतपात ।  
 गुआलेरीयन की परत भी आनि मिलन की बात ।४।  
 जौ दिन दुइक न वे मिलत तब आवत अरिराइ ।  
 कालि तिनू कै घर बिखै डारी कलह बनाइ ।५।

## चौपई

गुआलेरीया मिलन कहु आए । राम सिंघ भी संगि सिधाए ।  
 चतुरथ आनि मिलत भए जामं । फूटि गई लखि नजरि गुलामं ।६।

## दोहरा

जैसे रवि के तेज ते रेत अधिक तपताइ ।  
 रवि बल छुद्र न जानई आपन ही गरबाइ ।७।

## चौपई

तैसे ही फूल गुलाम जाति भयो । तिनै न द्रिसट तरे आनत भयो ।  
 कहलूरीया कटौच संगि लहि । जाना आन न मो सरि महि महि ।८।

तिन जो धन आनो थो साथी । ते दे रहे हुसैनी हाथा ।  
 देत लेत आपन कुरराने । ते धंनि लै निजि धाम सिधाने ।१।  
 चैरो तबै तेज तन तयो । भला बुरा कछु लखत न भयो ।  
 छंदबंद नह नैकु बिचारा । जात भयो दे तबहि नगारा ।१०।

दाव घाव तिन नैकु न कहा । सिंघहि घेरि ससा कहु डरा ।  
 पंद्रह पहरि गिरद तिह कीयो । खान पानि तिन जान न दीयो ।११।  
 खान पान बिनु सूर रिसाए । साम करन हित दूत पठाए ।  
 दास निरखि संग सैन पठानी । फूलि गयो तिन की नही मानी ।१२।

दस सहंस्त्र अब ही कै दैहू । नातर मीच मूंड पर लैहू ।  
 सिंघ संगतीया तहा पठाए । गोपालै सु धरम दे ल्याए ।१३।  
 तिन के संगि न उन की बनी । तब क्रिपाल चित मो इह गनी ।  
 ऐसि घाति फिरि हाथ न ऐ है । सबहूं फेरि समो छलि जै है ।१४।

गोपालै सु अबै गहि लीजै । कैद कीजीऐ कै बध कीजै ।  
 तनिक भनक जब तिन सुनि पाई । निज दल जात भयो भट राई ।१५।

### मधुभार छंद

जब गयो गुपाल । कुपियो क्रिपाल । हिंमत हुसैन । जुंमै लुझैन ।१६।  
 करि कै गुमान । जुंमै जुआन । बजे तबल । दुंदभ दबल ।१७।

बजे निसाण । नचे किकाण । बाहै तड़ाक । उठै कड़ाक ।१८।  
 बजे निसंग । गजे निहंग । छुटै क्रिपान । लिटै जुआन ।१९।

तुपक तड़ाक । कैबर कड़ाक । सैहथी सड़ाक । छोही छड़ाक । २०।  
 गजे सुबीर । बजे गहीर । बिचरे निहंग । जैसे पलंग ।२१।

हुके किकाण । धुके निसाण । बाहै तड़ाक । झलै झड़ाक ।२२।

जुझे निहंग । लिटै मलंग । खुल्हे किसार । जनु जटा धार ।२३।  
सजे रजिंद्र । गजे गजिंद्र । उत्तरे खान । लै लै कमान ।२४।

### त्रिभंगी छंद

कुपियो क्रिपालं सजि मरालं बाह बिसाल धरि ढालं ।  
धाए सभ सूरं रूप करूरं मचकत नूरं मुखि लालं ।  
लै लै सु क्रिपानं बाण कमाणं सजे जुआनं तन ततं ।  
रणि रंग कलोलं मार ही बोलै जनु गज डोलं बनि मतं ।२५।

### भुजंग प्रयात छंद

तबै कोपीयं कांगड़ेसं कटोचं । मुखं रकत नैनं तजे सरब सोचं ।  
उतै उठीयं खान खेतं खतंगं । मनो बिहचरे मास हेतं पलंगं ।२६।

बजी भेर भुंकार तीरं तड़के । मिले हथि बंधं क्रिपाणं कड़के ।  
बजे जंग नीसाण कथे कथीरं । फिरै रुंड मुंडं तनं तछ तीरं ।२७।

उठै टोप टूकं गुरजै प्रहारे । रुले लुथ जुथं गिरे बीर मारे ।  
परै कतीयं घात निरघात बीरं । फिरै रुड मुंडं तनं तन तीरं ।२८।

बही बाहु आघात निरघात बाणं । उठे नद नादं कड़के क्रिपाणं ।  
छके छोभ छत्र तजै बाण राजी । बहे जाहि खाली फिरै छूछ ताजी ।२९।

जुटे आप मै बीर बीरं जुझारे । मनो गज जुटै दंतारे दंतारे ।  
किधो सिंघ सो सारदूलं अरुझे । तिसी भाति किरपाल गोपाल जुझे । ३०।

हरी सिंघ धायो तहा एक बीरं । सहे देह आपं भली भाति तीरं ।  
महा कोप कै बीर ब्रिंदं संघारे । बडो जुध कै देव लोकं पधारे ।३१।

हठियो हिमतं किंमतं लै क्रिपानं । लए गुरज चलं सु जलाल खानं ।  
हठे सूरमा मत जोधा जुझारं । परी कुट कुटं उठी ससत्र झारं ।३२।

रसावल छंद

जसंवाल धाए । तुरंगं नचाए ।  
लयो घेरि हुसैनी । हन्यो सांग पैनी । ३३।  
तिनू बाण बाहे । बडे सैन गाहे ।  
जिसै अंगि लाग्यो । तिसे प्राण त्याग्यो ।३४।  
जबै घाव लाग्यो । तबै कोप जाग्यो ।  
संभारी कमाणं । हणे बीर बाणं ।३५।  
चहूं ओर ढूके । मुखं मार कूके ।  
त्रिभै ससत्र बाहै । दोऊ जीत चाहै ।३६।

रिसे खान जादे । महा मद मादे ।  
महा बाण बरखे । सभे सूर हरखे ।३७।  
करै बाण अरचा । धनुर बेद चरचा ।  
सु सांगं सम्हालं । करै तउन ठामं । ३८।

बली बीर रुझे । समुह ससत्र जुझे ।  
लगै धीर धकै । क्रिपाणं झनकै ।३९।  
कड़कै कमाणं । झणकै क्रिपाणं ।  
कड़कार छुटै । झणंकार उठै ।४०।

हठी ससत्र झारे । न संका बिचारे ।  
करे तीर मारं । फिरै लोह धारं । ४१।  
नदी स्रोण पूरं । फिरै गैणि हूरं ।  
उभे खेत पालं । बके बिकरालं ।४२।

पाधड़ी छंद

तह हड़ हड़ाइ हसे मसाण । लिते गजिंद्र छुटे किकराण ।  
जुटे सु बीर तह कड़क जंग । छुटी क्रिपाण बुटे खतंग ।४३।

डाकन डहकि चावड चिकार । काकं कहकि बजै दुधार ।  
खोलं खड़कि तुपकि तड़ाकि । सैथं सड़क धकं धहाकि ।४४।

### भुजंग प्रयात छंद

तहा आप कीनो हुसैनी उतारं । सभू हाथि बाणं कमाणं संभारं ।  
रुपे खान खूनी करै लाग जुधं । मुखं रक्त नैणं भरे सूर क्रुधं ।४५।

जगियो जंग जालम सु जोधं जुझारं । बहे बाण बांके बरछी दुधारं ।  
मिले बीर बीरं महा धीर बंके । धका धकि सैथं क्रिपाणं झनंके ।४६।

भए ढोल ढंकार नदं नफीरं । उठे बाहु आघात गजै सुबीरं ।  
नवं नद नीसान बजे अपारं । रुले तछ मुछं उठी ससत्र झारं ।४७।

टका टुक टोपं ढका ढक ढालं । महा बीर बानैत बकै बिक्रालं ।  
नचे बीर बैतालयं भूत प्रेतं । नची डाकिणी जोगनी उरध हेतं ।४८।

छुटी जोगतारी महारुद्र जागे । डगियो धिआन ब्रहमं सभै सिध भागे ।  
हसे किंनरं जछ बिदिआधरेयं । नची अछरा पछरा चारणेयं ।४९।

परियो घोर जुधं सु सैना परानी । तहा खां हुसैनी मंडिओ बीर बानी ।  
उतै बीर धाए सु बीरं जस्वारं । सबै बिउत डारे बगा से अस्वारं ।५०।

तहा खां हुसैनी रहियो एक ठाढं । मनो जुध खंभं रणभूम गाडं ।  
जिसै कोप कै कै हठी बाणि मारियो । तिसै छेद कै पैल पारे पधारियो ।५१।

सहे बाण सूरं सभै आण ढूकै । चहूं ओर तै मार ही मार कूकै ।  
भली भाति सो असत्र अउ ससत्र झारे । गिरे भिसत को खां हुसैनी सिधारे ।५२।

## दोहरा

जबै हुसैनी जुझियो भयो सूर मन रोसु ।  
भाजि चले अवरै सबै उठियो कटोचन जोस ।५३।

## चैपई

कोपि कटोचि सबै मिलि धाये । हिंमति किंमति सहित रिसाए ।  
हरी सिंघ तब कीया उठाना । चुनि चुनि हने पखरीआ जुआना ।५४।

## नराज छंद

तबै कटोच कोपीयं । संभार पाव रोपीयं ।  
सरक ससत्र झार ही । सु मारि मारि उचार ही ।५५।  
चंदेल चौपीयं तबै । रिसात धात भे सबै ।  
जिते गए सु मारीयं । बचे तिते सिधारीयं ।५६।

## दोहरा

सात सवारन कै सहित जूझै संगत राइ ।  
दरसो सुनि जुझै तिनै बहुरि जुझत भयो आइ ।५७।  
हिंमत हूं उतरियो तहा बीर खेत मझार ।  
केतन के तनि घाइ सहि केतनि के तनि झारि ।५८।  
बाज तहा जूझत भयो हिंमत गयो पराइ ।  
लोथ क्रिपालहि की नमित कोपि परे अरि राइ ।५९।

## रसावल छंद

बली बैर रुझै । समुहि सार जुझै ।  
क्रिपा राम गाजी । लरियो सैन भाजी ।६०।  
महा सैन गाहै । त्रिभै ससत्र बाहै ।  
घनियो काल कै कै । चलै जस लै कै ।६१।  
बजे संख नादं । सुरं निरबिखादं ।  
बजे डौर डढं । हठे ससत्र कढं ।६२।  
परी भीर भारी । जुझै छत्र धारी ।  
मुखं मुछ बंकं । मंडे बीर हंकं ।६३।  
मुखं मारि बोलै । रणं भूमि डोलै ।  
हथियारं संभारै । उभै बाज डारै ।६४।

रण जुझत किरपाल कै नाचत भयो गुपाल ।  
 सैन सबै सिरदार दै भाजत भई बिहाल ।६५।  
 खान हुसैन क्रिपाल के हिंमत रणि जूझंत ।  
 भाजि चले जोधा सबै जिम दे मुकट महंत ।६६।

## चौपई

इह बिधि सत्र सबै चुनि मारे । गिरे आपने सूर संभारे ।  
 तह घाइल हिंमत कह लहा । राम सिंघ गोपाल सिउ कहा ।६७।

जिनि हिंमत अस कलह बढायो । घाइल आजु हाथ वह आयो ।  
 जब गुपाल ऐसे सुनि पावा । मारि दीयो जीअत न उठावा । ६८।

जीत भई रन भयो उजारा । सिम्रित करि सभ घरो सिधारा ।  
 राखि लीयो हम को जगराई । लोह घटा अन ते बरसाई ।६९।

इति श्री बचित्र नाटक ग्रंथे हुसैन बधह क्रिपाल हिंमत संगतीआ बध बरननं  
 नाम गिआरमो धयाइ समापतम सतु सुभम सतु ।११।अफजू।४२३।

## चौपई

जुध भयो इह भाति अपारा । तुरकन को मारियो सिरदारा ।  
 रिस तन खान दिलावर तए । इतै सऊर पठावत भए । १।

उतै पठियो उनि सिंघ जुझारा । तिह भलान ते खेदि निकारा ।  
 इत गज सिंघ पंमा दल जोरा । धाइ परे तिन उपर भोरा ।२।

उतै जुझाए सिंघ भयो आडा । जिम रन खंभ भूमि रनि गाडा ।  
 गाडा चलै न हाडा चलि है । सामुहि सेल समर मो झलि है ।३।

बाटि चडै दल दोऊ जुझारा । उते चंदेल इते जसवारा ।  
 मंडियो बीर खेत मो जधा । उपजियो समर सूरमन क्रुधा ।४।

कोप भरे दोऊ दिस भट भारे । इतै चंदेल उतै जसवारे ।  
 ढोल नगारे बजे अपारा । भीम रूप भैरो भभकारा ।५।

धुणं ढोल बजे । महा सूर गजे ।  
 करे ससत्र घावं । चड़े चित चावं । ६ ।  
 त्रिभै बाज डारै । परघै प्रहारे ।  
 करे तेग घायं । चड़े चित चायं । ७ ।  
 बकै मार मारं । न संका बिचारं ।  
 रुलै तछ मुछं । करै सुरग इछं । ८ ।

## दोहरा

नैक न रन ते मुरि चले करै निडर ह्वै घाइ ।  
 गिरि गिरि परै पवंग ते बरे बरंगन जाइ । ९ ।

## चौपई

इह बिधि होत भयो संग्रामा । जूझै चंद नराइन नामा ।  
 तब जुझार एकल ही धयो । बीरन घेरि दसो दिसि लयो । १० ।

## दोहरा

धस्यो कटक मै झटक दै कछू न संक बिचार ।  
 गाहत भयो सुभटन बडि बाहति भयो हथिआर । ११ ।

## चौपई

इहि बिधि घने घरन को गारा । भाति भाति के करे हथियारा ।  
 चुनि चुनि बीर पखरीआ मारे । अंति देवपुरि आप पधारे । १२ ।

इति स्त्री बचित्र नाटक ग्रंथे जुझार सिंघ जुध बरननं नाम द्वादसमो  
 धियाइ समापतम सतु सुभम सतु । १२ । १४३५ ।

सहजादे को आगमन मद्र देस

## चौपई

इह बिधि सो बध भयो जुझारा । आन बसे तब धामि लुझारा ।  
 तब अउरंग मन माहि रिसावा । मद्र देस को पूत पठावा । १ ।  
 तिह आवत सभ लोक डराने । बडे बडे गिरि हेरि लुकाने ।  
 हम हूं लोगन अधिक डरायो । काल करम को मरम न पायो । २ ।

कितक लोक तजि संगि सिधारे । जाइ बसे गिरिवर जह भारे ।  
चित मूजीयन को अधिक डराना । तिनै उबार न अपना जाना ।३।  
तब अउरंग जीअ माझ रिसाए । एक अहदीआ ईहा पठाए ।  
हम ते भाजि बिमुख जे गए । तिन के धाम गिरावत भए ।४।

जे अपने गुर ते मुख फिर है । ईहा ऊहा तिन के ग्रिहि गिरि है ।  
इहा उपहास न सुरपुरि बासा । सभ बातन ते रहे निरासा ।५।  
दूख भूख तिन को रहै लागी । संत सेव ते जो है तिआगी ।  
जगत बिखै कोई काम न सरही । अंतहि कुंड नरक की परही ।६।

तिन को सदा जगति उपहासा । अंतहि कुंड नरक की बासा ।  
गुर पग ते जे बेमुख सिधारे । ईहा ऊहा तिन के मुख कारे ।७।  
पुत्र पउत्र तिन के नही फरै । दुख दै मात पिता को मरै ।  
गुर दोखी सग की म्रितु पावै । नरक कुंड डारे पछुतावै ।८।

बाबे के बाबर के दोऊ । आप करै परमेसर सोऊ ।  
दीनसाह इन को पहिचानो । दुनीपति उन को अनुमानो ।९।  
जो बाबे को दाम न दै है । तिन ते गहि बाबर के लै है ।  
दै दै तिन को बडी सजाइ । पुनि लै है ग्रहि लूट बनाइ ।१०।

जब ह्वै है बेमुख बिना धन । तबि चड़ि है सिखन कह मागन ।  
जे जे सिख तिनै धन दै है । लूटि मलेछ तिनू कौ लै है ।११।  
जब हुइ है तिन दरब बिनासा । तब धरि है निजि गुर की आसा ।  
जब ते गुर दरसन को ऐ है । तब तिन को गुर मुख न लगै है ।१२।

बिदा बिना जैहै तब धामं । सरि है कोई न कोई तिन को कामं ।  
गुर दरि ढोई न प्रभू पुरि वासा । दुहूं ठउर ते रहे निरासा । १३।  
जे जे गुर चरनन रत ह्वै है । तिन के कसटि न देखन पै है ।  
रिधि सिधि तिन के ग्रिह माही । पाप ताप छ्वै सकै न छाही ।१४।

तिह मलेछ छ्वै है नही छावा । असट सिधि ह्वै है घरि माहा ।  
हास करत जो उदम उठै है । नवो निधि तिन के घरि ऐ है ।१५।

मिरजा बेग हुते तिह नामं । जिनि ढाहे बेमुखन के धामं ।  
सभ सनमुख गुर आप बचाए । तिन के बार न बांकन पाए ।१६।  
उत अउरंग जीय अधिक रिसायो । चार अहदीयन अउर पठायो ।  
जे बेमुख ता ते बचि आए । तिन के ग्रिह पुनि इनै गिराए ।१७।

जे तजि भजे हुते गुर आना । तिन पुनि गुरु अहदीअहि जाना ।  
मूत्र डार तिन सीस मुंडाए । पाहुरि जानि ग्रिहहि लै आए ।१८।

जे जे भाजि हुते बिनु आइसु । कहो अहदीअहि किनै बताइसु ।  
मूंड मूंड करि सहरि फिराए । कार भेट जनु लैन सिधाए ।१९।

पाछै लागि लरिकवा चले । जानुक सिख सखा है भले ।  
छिके तोबरा बदन चड़ाए । जनु ग्रिहि खान मलीदा आए । २०।  
मसतकि सुभे पनहीयन घाइ । जनु करि टीका दए बलाइ ।  
सीस ईंट के घाइ करेही । जनु तिनु भेट पुरातन देही ।२१।

### दोहरा

कबहूं रण जूझ्यो नही कछु दै जसु नही लीन ।  
गाव बसति जान्यो नही जम सो किन कहि दिन ।२२।

### चौपई

इह बिधि तिनो भयो उपहासा । सभ संतन मिलि लखियो तमासा ।  
संतन कसट न देखन पायो । आप हाथ दै नाथि बचायो ।२३।

### चारणी । दोहरा

जिस नो साजन राखसी दुसमन कवन बिचार ।  
छवै न सकै तिह छाहि कौ निहफल जाइ गवार ।२४।  
जे साधू सरनी परे तिन के कवण बिचार ।  
दंति जीभ जिम राखि है दुसट अरिसट संघारि ।२५।

इति श्री बचित्र नाटक ग्रंथे साहजादे व अहदी आगमन बरननं नाम  
त्रोदसमो धियाइ समापतम सतु सुभम सतु ।१३।१४६०।

सरब काल सभ साध उबारे । दुखु दै कै दोखी सभ मारे ।  
अदभुति गति भगतन दिखराई । सभ संकट ते लए बचाई ।१।  
सभ संकट ते संत बचाए । सभ कंटक कंटक जिम घाए ।  
दास जान मुरि करी सहाई । आप हाथु दै लयो बचाइ ।२।

अब जो जो मै लखे तमासा । सो सो करो तुमै अरदासा ।  
जो प्रभ क्रिपा कटाछि दिखै है । सो तव दास उचारत जै है ।३।  
जिह जिह बिध मै लखे तमासा । चहत तिन को कीयो प्रकासा ।  
जो जो जनम पूरबले हेरे । कहिहो सु प्रभु पराक्रम तेरे ।४।

सरब काल है पिता अपारा । देबि कालका मात हमारा ।  
मनूआ गुर मुरि मनसा माई । जिनि मोको सुभ क्रिआ पड़ाई ।५।  
जब मनसा मन मया बिचारी । गुरु मनूआ कह कह्यो सुधारी ।  
जे जे चरित पुरातन लहे । ते ते अब चहीअत है कहे ।६।

सरब काल कुरणा तब भरे । सेवक जानि दया रस ढरे ।  
जो जो जनमु पूरबलो भयो । सो सो सभ सिमरण करि दयो ।७।  
मोको इती हुती कह सुधं । जस प्रभ दई क्रिपा करि बुधं ।  
सरब काल तब भए दइआला । लोह रछ हम को सब काला ।८।

सरब काल रछा सभ काल । लोह रछ सरबदा बिसाल ।  
ठीठ भयो तव क्रिपा लखाई । ऐडों फिरे सभन भयो राई ।९।

जिह जिह बिधि जनमन सुधि आई । तिम तिम कहे गिरंथ बनाई ।  
प्रथमे सतिजुग जिह बिधि लहा । प्रथमे देबि चरित्र को कहा ।१०।  
पहिले चंडी चरित्र बनायो । नख सिख ते क्रम भाख सुनायो ।  
छोर कथा तब प्रथम सुनाई । अब चाहत फिर करौ बडाई ।११।

इति श्री बचित्र नाटक ग्रंथे सरब कल की बेनती बरननं नाम चौदसमो  
धियाइ समापतम सतु सुभम सतु ।१४।१४७१।

